

Surat khabar: Utusan Sarawak (Tempatan)  
 Hari/Tarikh: 15/2/2016  
 Muka surat: 11

Tajuk : UNIMAS turut bantu mangsa banjir

# UNIMAS turut bantu mangsa banjir

**KUCHING:** Persatuan Pengurus UNIMAS (PPU) bersama wakil staf dan pelajar Universiti Malaysia Sarawak (UNIMAS) telah turun padang memberi sumbangan kepada mangsa banjir sekitar Kuching dan Bau.

Sehingga kini, lebih 5,000 mangsa banjir telah ditempatkan di 22 Pusat Pemindahan Banjir.

PPU bersama wakil staf dan pelajar UNIMAS menyumbang bantuan dalam bentuk minuman, makanan dan khidmat tenaga di dua pusat pemindahan banjir iaitu di Dewan Suarah Kuching dan Dewan Tupong Jaya.

Pusat pemindahan banjir di Dewan Suarah Kuching telah menempatkan seramai 779 mangsa banjir sejak lima hari lepas, apabila hujan lebat mengakibatkan banjir khususnya di kawasan Kampung Kudei Lama dan Kampung Kudei Baru. Manakala pusat pemindahan banjir di Dewan Tupong Jaya menempatkan seramai 332 orang mangsa banjir.

PPU yang diketuai oleh Presidennya, Mohd Husaini Noorjaya Chew, Pendaftar UNIMAS, Haji Abu Bakar Ibrahim dan wakil Majlis Perwakilan Pelajar telah menyerahkan sumbangan berupa 100 kotak air mineral dan 50 kotak biskut.

Wakil UNIMAS yang hadir juga telah

turut memberi khidmat kaunseling kepada mangsa-mangsa banjir serta program sokongan emosi bersama kanak-kanak yang terlibat di pusat pemindahan semestara tersebut.

Di samping itu, wakil UNIMAS bersama pihak NGO dan Jabatan Kebajikan Masyarakat (JKM) telah bekerjasama dalam memasak dan menyediakan hidangan kepada semua mangsa di pusat berkenaan. "Tabung UNIMASku Sayang yang telah diwujudkan tahun lepas merupakan inisiatif UNIMAS untuk membantu komuniti yang memerlukan," kata Haji Abu Bakar Ibrahim,

"Antara bantuan yang telah dilaksanakan menggunakan tabung ini ialah bantuan mangsa-mangsa banjir di Pahang dan Kelantan pada tahun lepas serta mangsa kebakaran di Kampung Asajaya Ulu pada November 2015 dan kebakaran yang melibatkan kediaman dua beradik di Kampung Tambirat pada Januari 2016 baru-baru ini," tambahnya.

Kerjasama erat pegawai-pegawai Bilik Gerakan Daerah Kuching, JKM, Jabatan Pertahanan Awam Malaysia, Ketua Kampung dan UNIMAS telah melancarkan semua urusan dan meringankan sedikit beban yang ditanggung oleh mangsa-mangsa banjir ini.



**KENANGAN ...** Persatuan Pengurus UNIMAS (PPU) bersama wakil staf dan pelajar Universiti Malaysia Sarawak (UNIMAS) bergambar bersama mangsa banjir yang menerima bantuan berbentuk barang makanan, minuman dan khidmat tenaga.